

## 20 Jahre Jubiläum Stiftung intact, Markthalle, 5.5.2017

### Remo Zumstein

(Jahr um Jahr entfaltet sech verstrichend,  
 Monet um Monet vergeit rasant u schliichend,  
 Immer e chli angers u doch sech immer gliichend,  
 U gliich o geng glichmässig vonenang abwiichend.  
 Wuchen um Wuche tanzt im 7/24istu-Takt,  
 Jedi Stung verschiebst Sekunde, i Minutene verpackt,  
 E zentrale Zitestrom, verästlet und vertrackt,  
 Unbeugsam im Fluss – bemässen und abghackt.  
 Und mitz dinn itz di Stifftig intact.)  
 „Intakt“ het ursprünglech „unberüehrt“ bedütet.  
 Aber unberüehrt vor Zit isch nid mau die Bedütig blibe.  
 Nid mau d Bedütig vo „intakt“ isch intakt,  
 Wüu nüt im Takt vor Zit  
 Unberüehrt vo ihre blibt.)

Aber loset säuber, wi's chönnt wärde:

I steuemer vor: Es isch dr Morge vom 5. Mai 2037. I hocken am Chuchitisch und i schlürfen e  
 Premium Hot Chocolate mit Caramel-Nidle-Topping. Sitem Bou vor ultratifige Starbucks-  
 Glasfaser-Leitig chame söttigi süessi Sünden i jedere Hushautig bezieh, wo zum Gebiet vor  
 inzwüsche fusionierte Grossgmeind Chrouch-Heimis-Hasli-Hindu-Ober-Burgdorf ghört.  
 Und i blätteren uf mim Hologramm-Tablet gmüetlech ir aktuellen Usgab vom Azeiger vo  
 Burgdorf und Umgäbig: Ufder Frontsite si zwe Texten abdruckt: Oben e Rückblick dadrüber,  
 dass sech sit dr Eröffnig vom Schützematt-Flüeh-Gondeli vor 10 Jahr d Übernachtige z  
 Burgdorf vervierfacht heige. U drunger e kritische Kommentar dadrüber, dass di Schwedisch  
 Akademie vode Wüsseschafte ihri Gloubwürdigkeit mit dr Verleihig vom Literatur-Nobäupriis  
 ane Burgdorfer Slam-Poet ändgütig ibüesst heig.

I blättere witer.

Di chirchleche Aläss ufder zwöite Site: Die Wuche fingt wieder en Unmängi vo Gedänk-  
 PowerPoint-Präsentatione statt füre heiliggsprochnig Schutzpatron vo Burgdorf, füre St. De-  
 mirov.

I blättere witer.

D Immobilierubrik isch wieder vou mit unzauhbare Luxusvillene im Gyrischache, wo sitem Wohnboupjekt „Gyri für die Gierige!“ the place to be isch.

I blättere witer.

Da. D Steueninserat. Und da prangt's: Obe rächts, diräkt über dr Usschribig vom Chrigu-Beck, wo e steuerträtende Berichtsleiter für di 17 Filialene ir Region Oberaargou-Basuland suecht, isch gross u pink das Inserat vor Stiftig intact platziert, wo vo sich Fougendes schribt: D Stiftig intact sig es überregionau tätigs und sit jehär pionierhafts Ungernähme, wo vor 40 Jahr aus Huslieferdienst si Afang heig gno. Denzumau sig dr Frömdtransport vo Läbesmittu no e grossi Bsungerheit gsi, schliesslech sig me Letzteri bis töif id 20er-Jahr vom 21. Jahrhundert egehändig i sogenannte Grossverteiler ga zämeramüsiere. O wo Lieferdienste fürd Ichöif gang u gäb sige worde, sig intact wi immer „beständig e Schritt vorus“ gsi, wo si ds Prinzip vom Huslieferdienst 2027, auso vor 10 Jahr, vo Grund uf neu definiert und sich säuber bim Wort gno heige aus e Dienst, wo nid eifach bis id Hüser lieferet, sondern wo Hüser lieferet – e Hus-Lieferdienst haut! Hüser fixfertig vorkonfektioniert u diräkt ab dr interne Hüserwerfft, wo hüt ds ganze ehemalige Buechmatt-Areal inähm. Viu vo de bishär 9 intact-Hüsermodäu, wi ds BourgeoisPlus, aber o ds 08Otto15-Standard prägi mittlerwile ds Stadtbiud vo wite Teile vom Mittuland.

Um em aktuelle Arbeitsafau grächt z wärde und e sächsmonatige Vaterschaftsurloub z kompensiere, suechi d Stiftig intact per 1. Ougust 2037 oder nach Veribarig wieder mehreri Huslieferigsprogrammierer/inne FA mitem Programmierbrevet für Hochleistigs-Husliefer-Helikopter (churz HHH).

Zudäm wärdi das Mau speziell – im Rahme vor Entwicklig vo ihrem nächste, 10. Fertigprodukt – e Lehrsteu aus Domizildesigner/in FA usgschribe.

U wüu die vor Stiftig intact scho geng e chli gwitzti Füchs si gsi, heisi o bim Aforderigsprofilu gschribe: Weme auso Eigeschafte wine ufggeschlosseneni Art und es abgeschlossnigs Outo, sowie e Herangehenswiis a Hüser, wo me aus erboulech chönn bezeichne, mitbringi, und es Flair drfür heig, Bouprojekt metaphorisch, aber o wörtlech nid i Sang z setze, de freui si sech uf Bewärbige.

Und woni di Usschribig so lise, hauteni inne und dankemer: Das chönnt doch no öpis si... Das wär doch e Zuekunft... Das wär doch eigentlech no e Lehrsteu... für mini Jüngschti!

[www.remozumstein.ch](http://www.remozumstein.ch)